

CART NECHW DAN' BZOJ POSTLW SAN PABLO CHE TIMOTEO

Pablo chzoje' cart che Timoteo

1 ¹ Neda' Pablo chzoja' cart nga chio' le' Timoteo. Naca' postlw che Jesucriston', le Diosen' len Xancho Jesucriston' gosone' mandadw chona' xšinen'. Dios nan' none' chio' yela' mban toli tocane na' Xancho Jesucriston' chone' cont zoacho lez šjayzoacho len le' toli tocane.

² Chzoja' le' Timoteo, le naco' ca dogualje xi'ina' da' bzejni'ida' le' cont chejnilažo' Criston'. Na' chnablaža' nita' Xacho Diosen' len Xancho Jesucriston' yesyeyaše' yesyeži'ilaže'de' le' na' yesaclene' le', na' yesone' cont soa cuezo' binlo len xbab da' yo'o lo' yichjlažda'ogun'.

Nita' bene' chosozejni'ide' diža' güenlaže'

³⁻⁴ Caten' gwza'a Efeson' gwy'a Macedonian' gwneyoeda' le' cont bega'ano' Efeson' neche nita' bal bene' chosozejni'ide' bene' Efeso ca diža' güenlaže'. Con bi cheyož yedo chesonchgüe' xbab che diaža che da' xoxta'ocho ca' na' cheso'e zan cuent che legaque'. Na' da' yoble chneyoeda' le' gono' mandadw bich yosozejni'ide' che da' ca'. Dan' chosozejni'ide' chonen ga yesacžejlaže' bene', na' bi chaclenen yesone' dan' gwlo'o Diosen' lo' na'cho gon chio' ba chejle'cho xtižen'.

⁵ Na' gono' mandadw yesone' güen, le chaclaža' yesenite' yesaque lježe'. Na' cont bibi gwžon yesaque lježe', cheyala' yesaque' bene' laždao' xilaže', cheyala' yesone' dan' nezecho naquen güen yogo' ni'a, na' cheyala' yesejli'e diža' li che Diosen' do yichj do laže'. ⁶ Bene' ca' chosozejni'ide' diža' güenlaže' bi chesone' ca', na' da'nan' cheso'e diža' da' bibi zaca'. ⁷ La'czla' chesaclaže' yosozejni'ide' ley dan' bzoj Moisésen', bi chesejni'ide' dižan' cheso'e na' neca chesejni'ide' da' ca' chesene' cheyala' goncho.

⁸ Nezecho ley nan' naquen güen con še gwchinchon can' cheyala' gwchinchon. ⁹ Na' lecze nezecho ley nan' gague chosbagan' bene' cheson da' güen, san chosbagan' bene' cheson da' mal na' bene' cheson güedenag len dan' nonen mandadw goncho. Chosbagan' bene' bi chosozenag che Diosen', na' bene' chesonteze' da' malen', na' bene' bi chesape' Diosen' bala'an' neca chesonxene'ne', na' bene' chesot no xaxna'gaque', na' len nochle bene' güet bene'. ¹⁰ Lecze chosbagan' bene' chesata'lene' no'ole bi nac xo'olgaque' o bene' byo bi nac bene' chegaque', na' no bene' byo bene' chesata'lenteze' ljež bene' byoe' gualaz no'ole, na' bene' cheseche'xoxje' bene' yoble cont chesote' legaque' chesezi'e mechw, na' bene' ca' chesonlaže', na' bene' ca' cheso'e diža' güenlaže' lao justis, na' note'teze bene' cheson da' zej clele len diža' güen da' ba bzejni'i Diosen'

chio'. ¹¹ Na' diža' güen da' ba bzejni'i Diosen' chio' zaca'chguan, na' Dios ben' zoa mba juisyw, le'na' ba gwlo'en lo na' chyixjue'edan' bene'.

Pablon' cho'e yela' choxclen che Diosen' na' che Jesucriston'

¹² Choa' yela' choxclen che Xancho Jesucriston' ben' chon cont chac chyixjue'eda' xtiže'na'. Choxclenen' chacde' gona' xšinen' can' chazlaže' na' da'nan' gwleje'nda' gonan'. ¹³ Gwleje' neda' la'czla' cana' bia' diža' bya' che' na' bgue'eda'ne' na' bchi bsaca' bene' ca' chesonxene' le'. Na' la'czla' bena' ca', Diosen' beyaše' beži'ilaže'de' neda', le bina' šejnilaža'ne' ca hora' na' bina' gacbe'eda' chona' clele. ¹⁴ Nach Xancho Jesucriston' nži'ilaže'chgüede' neda' na' goclene'nda' cont gwyejnilaža'ne', na' na'a chacda'ne' na' lecze chacda' yezica'chle bene'.

¹⁵ Da' nga naquen to diža' li da' zaca' šejle'cho: Jesucriston' bide' yežlio nga cont beque'e xtoła' chio' bene' güen da' xinj. Na' chacda' neda' naca' bene' la'zelagüe gwyanč xtoła'. ¹⁶ Na' la'czla' naca' bene' la'zelagüe gwyanč xtoła', Jesucriston' beyaše'de' neda' na' bezi'xene' chia' cont blo'e napchgüe yela' chxenlaže'. Bene' ca' cont bene' za' za'ac yesacbe'ede' nape' yela' chxenlaže' xen na' yesejnilaže'ne' na' gata' yela' mban chegaque' toli tocane. ¹⁷ Cheyala' gonxencho Diosen' ben' nac Rey chechon' toli tocane. Gague da' te chen'. Zoacze' la'czla' bi chle'echone' na' naque' la'zelagüe bene' sina'. Totc le' zaque' gonxencho na' gapchone' bala'an toli tocane. Na' can' gonšcaczcho.

¹⁸ Xi'ina' Timoteo, ben xbab che dižan' gosoe' bene' ca' bosozende' le' can' gwna Diosen' chio' cana'. Na' can' ba gose'e le' gono' xšin Diosen', lecze can' chneyoeda' le' gonon' do yichj do lažo', la'czla' še gacdo' zdebe gonon'. Soachacho' šejnilažo' Diosen', na' soatezo' gono' cont nezdo' lo' laždaguo' bibi da' mal chono'. ¹⁹ Bał bene' chesonteze' da' malen' la'czla' zjanęztede' lo' lažda'ogüe' bi cheyala' yesonen', na' da'nan' ba gosebejyichje' bich chesejnilaže' Diosen'. ²⁰ Can' goc che Himeneo na' che Alejandro. Da'nan' ba gwnabda' Diosen' yesaque' lo' na' Satanás dan' chnabia' da' xigüe' ca', na' gonen con ca chaclažen' len legaque' cont yesacbe'ede' bi cheyala' yeseneye'e che Diosen'.

Dan' cheyala' nabecho Diosen' gone'

2 ¹ Na' dan' nac da' žialao xen gon chio' chonxencho Diosen': cheyala' nabecho Diosen' gone' bi dan' chyažje chio' lente dan' cheseyažje yogo'lol bene', na' nabechone' gaclene' yogo'lol bene', na' güe'cho yela' choxclen che Diosen' che bi da' güen da' chesac che yogüe'. ² Cheyala' nabecho Diosen' gaclene' bene' gwnabia' ca', no rey, no gobernador na' nochle bene' ca' chesenabia', cont soa cuezcho binlo na' bibi gwžon gonxencho Diosen', neca gata' da' gwžon goncho bichle da' cheyala' goncho. ³ Naquen güen nabecho Diosen' gaclene' yogüe' na' naquen da' chazlaže' Diosen', Dios ben' none' chio' yela' mban toli

tocane. ⁴ Le chaclaže' gwnežjue' yela' mban toli tocane che yogo'lol bene' na' chaclaže' yesejni'ide' diža' li che'. ⁵ Toz Diosen' zoa bene' zaca' yesonxen yogo'lol bene', na' lecz toz ben' chozoe' chio' binlo len Diosen', le'na' Jesucriston' ben' golje benach. ⁶ Jesucristw nan' bnežjw cuine' gote' neche da' mal da' goson yogo'lol benach, na' cate' bžin ža Diosen' bžie' bia', cana' bene' cont goseneze benachen' che'. ⁷ Na' Diosen' gwleje' neda' cont naca' postlw che' na' cont chyixjue'eda' xtiže'. Choa' diža' li, bi chonlaža', le naca' Criston' txen, gwleje'nda' cont chzejni'ida' bene' ca' bi zjanac bene' Israel diža' li che' cont yesejnilaže'ne'.

⁸ Na' dan' che'nda' gac gate'teze chesedop chesežague' chesonxene' Diosen', chaclaža' bene' ca' yosol güiže' Diosen' yesaque' bene' laždao' xilaže' cont yeselis na'gaquen' laogüen' sin cbi yeseže'e bene' o yosošašlene' bene'. ⁹ Na' ca' nac no'ol ca' chesonxen Jesucriston', bi cheyała' yesebec yichjgaque' še nite' xdanchgua, še yosoguale' bga o ret de oro o de perlas dan' naquen da' zaque', še nac yiša' yichjen' xdanchgua, na' še nac xagaque' da' chzaca' la'ay. ¹⁰ San cheyała' yesebec yichjgaque' yesone' da' güen ca' chaclaže' Diosen' yeson yogo' bene' chesejnilaže'ne'. ¹¹ Na' no'ol ca' lecze cheyała' nite' šize yosozenague' che bene' ca' chosed chosolo'ede' xtiža' Diosen', na' yesone' con da' yese'ene'. ¹² Neda' bi chona' latje cont no'ol ca' yosozejni'ide' bene' byo latje lagüe', na' neca chona' latje yesenabi'e bene' byo. Cheyała' yesenite' šize, ¹³ le cate' Diosen' bene' benachen' zgua'tec bene' Adánna' na' gwdechle bene' Evan'. ¹⁴ Na' cate' Satanás dan' chnabia' da' xigüe' ca' gwxoayaguen bene' nechw ca', gague gwxoayaguen Adánna', san gwxoayaguen Evan' cont bene' dan' gwna Diosen' bi gone', na' da'nan' beyaque' bene' güen da' xinj. ¹⁵ Perw na' la'czla' no'ol ca' chesežaglagüe' chesezan xi'ingaque', žin ža šjasyenite' len Diosen' še zjanite' chesejnilaže'ne' na' še zjanite' chesacde'ne' na' chesacde' yezica'chle bene', na' še zjanite' chesone' can' chazlaže' Diosen' len yela' sina' da' ba bnežjue' legaque'.

**Can' yeson bene' ca' yosogüia yesene'e yezica'chle bene'
chesonxene' Diosen'**

3 ¹ De to diža' da' zaca' šejle'cho da' žan: “Bene' chesaclaže' yosogüia yesene'e yezica'chle bene' chesonxene' Diosen', chesaclaže' yesone' to da' güen, še ca'.” ² Na' bene' gwłane' gone' žin dan' nac ca' cheyała' soateze' gone' da' güen yogo' ža sin cbi gone' da' zaca' tilchone'. Cheyała' soa toz no'ol che', na' cheyała' gague' bene' yo'o xbab, na' gague' bene' chnabia' cuine' chone' da' güen, na' gague' bene' chon da' zej toli cont bene' yoble yesape' le' bala'an. Cheyała' yebede' gwlebe' bene' liže', na' cheyała' gague' bene' chac chzejni'ide' xtiža' Diosen' binlo. ³ Bene' chože' bi gac gwłane' žinna'. Bi cheyała' gague' bene' yolao chdile chšaše'. Cheyała' gague' bene' šagüe' bene' chon güen len yezica'chle bene', na' bi

cheyala' gaque' bene' chon znia, neca selaže'chgüe' gone' gan mechw.
⁴ Na' cheyala' gaque' bene' neze can' gone' cont xi'ine' ca' na' nochle bene' nita' liže' yosozenague' che' na' yesape' le' bala'an. ⁵ Le še bi neзде' nac gone' cont xi'ine' ca' yosozenagbe' che' na' yesapbe' le' bala'an, bi gac gone' cont bene' chesedop chesežag chesonxene' Diosen' yosozenague' che'. ⁶ Bi cuejle bene' za' chzolao chejniłaže' Diosen' cont gwgüia ne'e bene' ca' chesonxene' Diosen', le bene' coben' xož gonxen cuine' na' tena' Diosen' güe'e le' castigw še gone' ca'. Can' goc che Satanásen' cani'te cate' benxen cuinen na' Diosen' bebejen' gan' zoe'na'. ⁷ Na' bene' cuejle cheyala' soe' gone' cont bene' ca' bi zjanac txen yesenezde' chone' güen, le še gone' da' malen' yesene' bene' che' na' Satanásen' co'oyelan' le' gonche' da' malen'.

Bene' ca' yeson žin bixjw

⁸ Na' lecze cate' cuejle bene' yeson žin bixjw da' chata' len bene' ca' chesonxene' Diosen', le cuej bene' cheson güen cont gapcho legaque' bala'an. Lecze cheyala' yesaque' bene' chesoe' diža' li da' šejle'cho, bene' bi zjayolagüe' chesezožde', na' bene' bi yesezelaže' yeseni'e che xšin Diosen' dan' yesone'na'. ⁹ Cheyala' yesaque' bene' chesejle'e cayanen' ba bzejni'i Diosen' chio' che Jesucriston' dan' nono gwneze cana', na' bene' cheson da' güen cont yesenezde' lo' yichjlažda'ogüe' chesone' can' chazlaže' Diosen'. ¹⁰ Na' cate' za' cuejle bene' ca' yeson žin bixjwna', le na'yane' can' chesonen', na' še gata'bia' chesonen' binlo bibi chesechoe', nachen' cuejle legaque'. ¹¹ Na' no'ol ca' yeson xšin Diosen' lecze cheyala' yesone' cont gapchone' bala'an. Bi cuejle no'ole chnie' che bene' o no'ole yolagüe' sožde', san cuejle no'ol ca' yesenite' yesone' can' chazlaže' Diosen'. ¹² Na' cate' cuejle bene' byo yeson žin bixjw da' chata' ladjo bene' ca' chesonxene' Diosen', le cuej bene' zoa toze no'ol che', na' bene' chon cont bi' che' ca' na' nochle bene' nita' liže' chosozenague' che'. ¹³ Le še bene' ca' cheson žin bixjon' yesone' binlo dan' yo'o lo na'gaque' yesone', nach yesejniłaže'chgüe' Jesucriston' sin cbi yesežebe', na' yezica'chle bene' yesape' legaque' bala'an.

Da' chejni'icho che Diosen' dan' nono gwneze cana'

¹⁴ Chzoja' le' da' quinga da' cheyala' gonle la'czla' zoa' lez yob yida' gan' zon', ¹⁵ cont še šeda' ba nezdo' nac cheyala' yeson bene' ca' zjanac diaža che Diosen', le chio' chdop chžagcho chonxencho Jesucriston' naccho diaža che Diosen' ben' zoa toli tocanē. Na' chio' chdop chžagcho chonxenchone' yo'o lo na'cho choncho cont chesombia' bene' diža' li che Diosen'. ¹⁶ Da' licze da' zaca'chgua dan' ba bzejni'i Diosen' chio'. Cana' nono gwneze da' quinga dan' bzejni'ide' chio' che Jesucriston', žan:

Diosen' bide' golje' benach,

na' Spiritw che Diosen' blo'en naque' bene' güen juisyw.

Na' bene' ca' zjanac angl che Diosen' bedesene'e le'.
 Na' bžin ža Diosen' bene' cont beyepe' yaba gan' yo'ochgua be'ni'.
 Na' bene' ca' cheso'e xtižen' ba goseyixjue'eden' len bene' že' nación
 zito',
 na' zan bene' že' lo yežlion' ba chesejle'e che'.

Žin ža ba| bene' yesebejyichje' diža' li che Diosen'

4 ¹ Na' Spiritw che Diosen' ba ben' diža' li cont šejni'icho žin ža cate'
 ba| bene' yesebejyichje' diža' li che Diosen' dan' chejle'cho na'
 yesejle'e che bi da' yeson da' xigüe' ca' cont yesexoayaguen legaque'.
² Da' xigüe' ca' yesonen cont nita' bene' yosozejni'ide' diža' güenlaže' da'
 siyen' bene', na' bene' ca' yosozejni'ide' diža' güenlažen' bibi yesacde' lo'
 yichjlažda'ogüe' caten' yeseziye'e bene'. ³ Yosožone' yosošagna' bene' na'
 yosožone' ye'ej gagwcho ba| yela' guagw, la'czla' Diosen' bene' cont zjade
 yela' guagw ca' cont chio' chonxencho Criston' na' nombia'cho diža' li
 chen' gagwchon na' güe'cho yela' choxcen che'. ⁴ Yogo' dan' ben Diosen'
 naquen güen na' bi naquen da' gue'echo, con še güe'cho yela' choxcen
 che' caten' gagwchon. ⁵ Na' nezecho guac gagwcho bite'teze yela' guagw,
 le ba gwna Diosen' naquen güen, na' güe'cho yela' choxcen che' cate'
 gagwchon.

Can' gon Timoteo xšin Diosen'

⁶ Ca nac bene' ljež chio' chonxencho Jesucriston', cheyala' gwzejni'ido'
 legaque' da' quinga ba gwnia' le' cont gacleno' legaque' can' chazlaže'
 Jesucriston', le gwleje' le' cont gwzejni'ido' bene'. Lecz gonen chachlažo'
 še gwzejni'ido' bene' xtiža' Diosen' dan' chejle'cho, le naquen to diža'
 güen, na' ba bzenago' chen do yichj do lažo'. ⁷ Bi gwzenago' che diža'
 güenlaže' dan' chesaljlaže' bene' bi chesonxene' Diosen'. Ben byen soaczo'
 gono' can' chazlaže' Diosen'. ⁸ Nezecho cate' chda ni'a na'cho chaclenen
 cuerp chechon' late'. Perw na' cate' choncho can' chazlaže' Diosen',
 chaclenchen chio' cont zoa chbezcho binlo na'a na' lecz ca' cate'
 šjayzoacho len le' toli tocanē. ⁹ Can' ža to diža' dan' zaca' šejle'cho na'
 dan' zaca' gwzenagcho chen do yichj do laže'cho. ¹⁰ Na' cont choncho
 can' chazlaže' Diosen', da'nan' chonchguacho xšinen' na' chyo
 chchejlaže'cho cate' chzi'diža' bene' chio', le nezecho Diosen' zoe' toli
 tocanē na' zoacho lez gone' güen len chio'. Le' chaclaže' gwnežjue' yela'
 mban toli tocanē che yogo' benach, na' can' nacczen gone' len bene'
 chesejnilaže' Jesucriston'.

¹¹ Da'nan' bzejni'i bene' da' ca' ba gwnian' na' ben mandadw
 yosozenague' che yogo'czen. ¹² Bi go'o latje yosozoa bene' le' šla'ale lagüe
 da' naco' bene' xcuide'. Len xtižo' na' len da' chono' ben güen cont yogo'
 bene' chesejnilaže' Criston' yesape' le' bala'an. Len xtižo' na' len da'
 chono' blo'e legaque' ca cheyala' yesacde' Diosen' na' bene' lježgaque', ca

cheyala' yesenita' chache' yesejnilaže'ne' na' ca cheyala' yesaque' bene' laždao' xilaže'. ¹³ Na' na'a šlac biña' yida' da' yoble, gwlec yichjo' gwlabo' Xtiža' Diosen' dan' nyojen len bene' ca' chesedop chesežag chesonxene' Jesucriston'. Na' gwneyoede' yosozenague' chen na' bzejni'ide' bi zejen. ¹⁴ Bi gatlažo' dan' gwlo'o Diosen' lo nao' gono' caten' goşoxoa na' bene' blao ca' yichjon', bene' ca' chosogüia chesene'e ljež chio' chonxencho Diosen', bosozende' le' gwlej Diosen' gono' xşinen'.

¹⁵ Cheyala' cuec yichjo' do yichj do lažo' gono' da' ca' gwlej Diosen' le' gono' cont yogo' bene' yesele'ede' zejcho' chono' da' güen. ¹⁶ Na' gwsaco' can' soa cuezo' cont soachacho' gono' con can' chazlaže' Diosen' na' soachacho' gwzejni'ido' bene' xtiža' Diosen' con can' naquen. Ben ca' cont gaclenen le' na' lecze gaclenen bene' ca' chosozenag xtižon' cont şjazyoalenle Diosen' cate' žin ža.

Can' cheyala' gon Timoteo len yezica'chle bene' chesejnilaže' Criston'

5 ¹ Še no bene' byo gole chone' bi da' mal, bi tilo'ne', san gwneyoede' cuejyichjen', con ben xbab naque' xao'. Na' še no bene' xcuide' chone' bi da' mal, gwneyoede' cuejyichjen', con ben xbab naque' bene' bišo'. ² Na' še no no'ol gole chone' bi da' mal, gwneyoede' cuejyichjen', con ben xbab naque' xnao'. Na' še no no'ol xcuide' chone' bi da' mal, gwneyoede' cuejyichjen', con ben xbab naque' bene' zano'. Cheyala' gwsaco' cont gaco' bene' laždao' xilaže' len legaque'.

³ Chio' chdop chžagcho chonxencho Criston' cheyala' gwnežjwcho da' cheseyažje no'ol ca' ba gosat bene' chegaque' še da' li zjanaque' bene' chyažj chchine. ⁴ Perw še nita' no xi'ingaque' no xesoagaque', bzejni'ide' legaque' cheyala' yosonežjue' da' cheseyažje no'ol ca', le no'ol ca' ba bososgole' legaque', na' Diosen' chaclaže' yesone' güen len legaque' cont yosolo'e chesejnilaže'ne'. ⁵ No'ol ca' nono zoa bene' gwnežjw legaque' da' cheseyažjde' na' zjanaque' dogualje güezebe, yesenite' lez gaclen Diosen' legaque' na' do ža do yel yesenite' yesenabde'ne' gaclene' legaque'. ⁶ Perw no'ol güezeb ca' chesacde' yesone' con ca' žan chegaque', len Diosen' yichjlažda'ogaquen' naquen ca' che to bene' ba got la'czla' ne' zjambane'. ⁷ Ben mandadw neche bene' ca' chesedop chesežag chesonxene' Jesucriston' yesone' can' žia' nga na' bibi da' mal yesone' da' zaca' no tile legaque'. ⁸ Še no bene' bi chaclene' cont gata' da' chyažje bene' zjanac diaža che', ba bzoe' šla'ale xtiža' Diosen' dan' chejle'cho chen, na' malech chone' ca' bene' bi chesejnilaže' Jesucriston'. Na' leca da' mal chone' še bi chaclene' bene' lo' yo'o che'.

⁹ Quinga nezdo' no no'ol güezeb ca' cheyala' gwchelo' le'e yiš cont bene' ca' chesedop chesežag chesonxene' Jesucriston' yosogüe'ej yosoguagüe'ne' na' yosonežjue' bichle da' cheseyažjde'. Cuejle no'ol gol ca' bene' ba gwde gayon iz, no'ole goc toze bene' che'. ¹⁰ Cuejle con no'ol ca' zjaneze bene' ba gosonchgüe' da' güen, ca' no da' quinga: še bosgole'

bi' che' binlo, še blebe' bene' liže', še goclene' yezica'chle bene'
chesonxene' Diosen', še goclene' bene' ca' cheseyi chesezaque', o še ba
bene' bite'tezechle da' güen.

¹¹ Bene' ca' chesedop chesežag chesonxene' Jesucriston' bi cheyała'
yesego'o lo na'gaque' yosogüe'ej yosoguague' no'ol güezeb xcuide' ca'. Le
no'ol ca', gwžin ža yesaclaže' yosyošagne'e da' yoble, ¹² na' yesape' doła'
še yesebejyichje' xšin Criston' dan' gosechebe' yesone'. ¹³ Na' lecze no'ol
güezeb xcuide' ca' bi naquen güen gwco'olaochwne' yeselaže' to to liž
bene', cont bi yesaque' bene' xagüed, na' cont bi yesaque' bene' güetob
diža'. Bi yeselaže' to to liž bene' yesezi'diže' bi chac, le bi cheyała'
yesone' dan' nac ca'. ¹⁴ Da'nan' chaclaža' no'ol güezeb xcuide' ca'
yosyošagne'e da' yoble na' yesezanche' cont yosyosgole' xi'ingaque' na'
yosogüia yesena' ližgaquen' binlo, na' bi yesone' cont bene' ca'
cheseque'ede' chio' yesene' chesone' da' mal. ¹⁵ Chnia' ca' le nita' bał no'ol
güezeb xcuide' ca' ba gosebejyichje' Criston' na' chosozenague' che
Satanásen'.

¹⁶ Note'tez bene' chejnilaže' Criston', še nita' no'ol güezeb lo diaža
chegaque', cheyała' yosonežjue'ne' da' yese'ej yesagüe' cont bibi da' zed
yesone' len bene' ca' chesedop chesežag chesonxene' Criston'. Nach con
no'ol ca' nono zoa yesaclen legaque', legacze' cheyała' yesego'o lo na'
bene' ca' chesedop chesežag chesonxene' Criston'.

¹⁷ Na' ca' nac bene' blao ba zjanchoj chosogüia chesene'e bene' ca'
chesedop chesežag chesonxene' Criston' to to yež, še chesene'e bene' ca'
binlo, da' xen cheyała' yesacxene', na' cheyała' gwnežjwchone' da'
yesacbande'. Na' zaca'che' yesacxene' še cheseyixjue'ede' xtiža' Diosen'
na' chosozejni'ide' bene' bi zejen. ¹⁸ Cheyała' yesacxene' na'
gwnežjwchone' da' yesacbande', le nyoj Xtiža' Diosen' žan: “Bitw
gwseyjwle cho'a goñ cont ca' gagwba' cate' chlej chšošjba' trigon' neche
choj xen'.” Na' lecz nyojen žan: “Bene' güen žin cheyała' si' laxjue'.”

¹⁹ Bi gono' cuent cate' no'ol bene' gagw xya che to bene' blao bene' nchoj
chgüia chne'e bene' lježe' chesonxene' Criston' še bi zoa yeto bene' o
yechope bene' co' da' bałi. ²⁰ Na' še da' li ba bene' da' malen', cheyała'
tilo'ne' lao bene' ca' chesedop chesežag chesonxene' Criston' cont
yezica'chle bene' ca' yesežebe' yesone' da' malen' nac ca'. ²¹ Na' toze can'
cheyała' gono' len note'teze bene', bitw nacho bał bene'
gonxenchguachone' na' yebale' gonchone' nacteze. Na' Diosen' len
Xancho Jesucriston' na' len angl bene' ca' zjanchoj chesone' mandadw
che' zjanezde' chona' mandadw gono' yogo' da' ca' ba gwnia' nga. ²² Bitw
yob cuejo' bene' güia ne'e lježe' cont gague leno' gapo' doła' še ben'
gwlejon' gone' da' mal. Gwsaco' cont bibi doła' gapo'.

²³ Na' dan' tołize chac li'o, bi ye'ejo' toze nis, san güe'ej late' güeje
vino.

²⁴ Bal bene' nacbia' chesone' da' mal na' yogo'ze bene' zjanezde' can' chesonen' la'czla' bina' žin ža yesezi'e castigw chen. Na' bal bene' chesone' da' malen' dan' ngaše' na' da' bi nacbia', perw žin ža gwlo'elaon.
²⁵ Na' lecz ca' naquen len bene' ca' cheson da' güen, nacbia' še da' güenna' chesone', na' la'czla' gague nla' da' güenna' chesone', bi nacho yega'ancze bagaše'ze dan' chesonen'.

6 ¹ Na' bene' ca' chesejnilaže' Criston', bene' zjanac esclavos, cheyala' yesacbe'ede' bene' ca' zjanaque' xn žin chegaquen' zjazaque' cont yosozenague' chegaque'. Cheyala' yesape' legaque' bala'an' cont nono ne yela' ya' che Diosen', neca no ne che dan' chzejni'ichon'. ² Bene' ca' zjanac esclavos, še xnangaque' lecze chesejnilaže' Criston', bi cheyala' yesone' xbab bi yosozenague' chegaque' neche zjanaque' txen chesonxene' Criston', san nachle cheyala' yesone' žinna' do laže'che' na' cheyala' yesacde' xn žin ca' ca bene' biše', lagüe zjanaque' txen chesejnilaže' Criston'. Bzejni'i da' ca' ba gwnia' cheyala' yesone' na' gwneyoe bene' yosozenague' chen.

Cheyala' soacho mbalaz len da' de checho

³ Nita' bene' chosozejni'ide' xbab chegacze' na' bi chososed chosolo'ede' diža' li che Xnacho Jesucriston' dan' ba blo'eda' le', na' chosozejni'ide' clele, chesene' bi chonen byen soacho goncho can' chazlaže' Diosen'.
⁴ Bene' ca' chosozejni'ide' dan' zej clele chesonxen cuingaque', chesacde' zjanezde' da' zan, len bibi chesejni'ide'. Chosošaše' che no diža' o che bichle da' bi naquen da' zaque', chesacxi'e lježe', chesacyože' len lježe', chesezi'diža' lježe', na' chesacde' chesacxi'a bene' legaque'. ⁵ Con bi cheyož chedo chesedil chosošaše', le ba yo'o da' malen' lo' yichjlažda'ogüe' na' bi zjanombi'e diža' li che Diosen'. Con chesacde' yososed yosolo'ede' xtiža' Diosen' cont yesaque' bene' gwni'a. Bi gono' txen len ben' cheson ca'. ⁶ Da' li zoachguacho binlo cate' choncho can' chazlaže' Diosen' na' cate' zoacho mbalaz len bi da' dao' de checho.
⁷ Ga'alcho bla'cho yežlion' na' ga'alcho cate' yeza'cho. ⁸ Na' še de da' che'ej chagwcho na' še de xlana'cho da' chyažjecho, cheyala' soacho mba len da' ca'. ⁹ Bene' ca' chesezelaže' yesaque' bene' gwni'a chosozenague' che da' malen' na' cheselažoe' lo na' gwxiyen'. Chesezelaže' da' zan da' gata' chegaque' da' yesede chen, na' da' ca' chesezelaže' chesonen mal len legaque' na' žin ža yesebiaye'e. ¹⁰ Bene' chzelaže' mechw nach chzenague' che bite'teze da' mal. Na' nita' bene' ba gosebejyichje' diža' li che Diosen' dan' chesezelaže' mechon', na' da' zan dan' chosožaglaochgüe' yela' güen da' mal chegaque'na'.

Cheyala' cuec yichj Timoteon' gone' xšin Criston'

¹¹ Na' ca' nac le' Timoteo, bi gono' can' cheson bene' ca', le Diosen' gwleje' le' cont gono' xšinen'. Cuec yichjo' gono' da' zej to licha, ben con

can' chazlaže' Diosen', soachacho' šejnilažo'ne', goque bene', byo bchejlaže' cate' de da' saca'zi'o, na' goc bene' šagüe'. ¹² Gwlec yichjo' ben con ga zelao saquedo' cont gono' yogo' dan' chazlaže' Diosen'. Na' bebe dan' šjayzo' len Diosen' toli tocane, le Diosen' gwleje' le' šjayzo' len le', na' ba bi'o diža' lao bene' zan žo' chejnilažo'ne'. ¹³ Dios ben' chnežjo yela' mban che yogo' benachen', che beyixe' ca' na' che bica'chle da' zjamban, na' Jesucristw ben' be' diža' li lao Poncio Pilato, gwne' Diosen' gwsele'ne', legaque' zjanezde' chona' mandadw ¹⁴ gwzenago' che yogo' dan' ba gwnia' le', na' bi go'o latje ten ca'ze, cont bi gono' da' zaca' no tile le'. Bzenag che yogo' dan' bena' mandadw gono' žinte ža yid Xancho Jesucriston' da' yoble. ¹⁵ Le cate' žin ža gwžia bia' Diosen', nach yide' da' yoble. Toz Dios nan' chnabi'e doxen na' zoachgüe' mba. Len' naque' Rey ben' chnabi'e yezica'chle rey ca', na' naque' Xancho ben' chnabi'e yezica'chle bene' gwnabia'. ¹⁶ Totec Dios nan' bi nacho žin ža gate'. Na' catec yo'ochgua be'ni' gan' zoen', nono gac bigue' gala'ze gan' zoe'na'. Nono zoa yežlio nga bene' ba ble'ede' Diosen' na' nono gac le'e le'. Cheyala' gonxenchone' le chnabi'e toli tocane. Na' can' gonšcaczcho.

¹⁷ Na' ca nac bene' ca' chesejnilaže' Criston', bene' zjanac bene' gwni'a lo yežlio nga, gože' bi yesaque' bene' ya'laže'. Na' yo'o legaque' bi yesone' xbab yesenite' mba lagüe zjanaque' bene' gwni'a, le yob te che bite'tez da' de chegaque'. Yo'o legaque' yesezoe' lez yesenite' mbalaz len Dios ben' zoe' toli tocane. Toga le' chone' chio' yogo' da' güen da' chyažjecho na' da' chbecho. ¹⁸ Na' yo'one' yesenite' yesonchgüe' da' güen, yesone' yogo' cuen da' güen can' chazlaže' Diosen', nach lecze yo'one' yesezande' da' de chegaque' cont yesaclene' bene' na' yesebede' yesone' ca'. ¹⁹ Še yesone' ca', na' gaquen ca to yela' gwni'a da' bi te chen, le Diosen' chaclaže' yesaclene' bene', na' gone' cont yesenite' mba cate' šjasyenite' len le' toli tocane še yesone' ca'.

Pablon' chzože' carten'

²⁰ Timoteo, gwlecchgua yichjo' che yogo' dan' ba bzejni'i Diosen' le'. Bi gwzenago' che bene' chosošalj diža' da' bibi zaca', ne che dan' chesene bene' dan' bi zej lebe len diža' li che Diosen'. Chesonlaže' chesene' cheso'e diža' sina'. ²¹ Bene' bosozenague' che dižan' nac ca' ba gosebejyichje' diža' li che Diosen' da' chejle'cho na' bich chesejnilaže'ne'. Chnabšca' gaclen Diosen' le'. Da' na'zen' chzoja'.